

## ■ COLUMNA

# Momo

DA DAVID SPINNLER\*

En sasez enconuschevan nus quai be or da romans fictivs ubain sco trists exempels istorics en stadis nunpussaivels. Ch'i dat prescripziuns tgi che dastga in summa anc lavurar, ch'ins na po betg pli avoir contact social auter che da maniera digitala, ch'ins na dastga betg pli sa radunar etc. etc. Ed uss è quai nossa realitad. Mes vitg è vid – mort ora sco sche la pesta fiss sa derasada. Quai malgrà che a Sta. Maria en Val Müstair pudessan tut ils radund 300 abitants sa radunar senza problems *cun* respectar la distanza da plirs meters tranter ina persuna e l'autra.

In virus che naging enconuscheva, davart il qual ils experts na san anc betg la massa, e già acceptain nus – senza dumandar – mesiras totalitaras. Nus essan sco ina muntanera da nursas.

Clér: Ils experts vegnan cad avoir studegià bain avant che decretar las mesiras. Ils virologs san gea da tge ch'els discurren (era sche lur opiniuns n'èn in summa betg unidas). Ed ils politichers vulan segir tuts mo il meglia per mintgin e mintgina da nus.



Ma pertge na discutain nus betg da maniera controversa davart tut las mesiras? Pertge sa fixain nus mo anc sin curvas da cas dad infecziuns? Pertge na datti betg debattas ferventas davart la dumonda sch'igl è gist da restrencher talmain nossas libertads en cas dad in virus privlus? Pertge na datti betg debattas davart la dumonda da la mort: Datti ina mort ch'è «gista» ed ina che n'è «betg gista»? Avain nus ina sauna relaziun cun noss esser limità – cun la mort?

La panica collectiva da quest virus ans lascha perder la fidanza en nus sez. Cun las mesiras actualas stuschain nus il virus davant nus nà. Senza reflectar da maniera pli profunda e cun debattas publicas nossa situaziun da vita: Restan nossas valurs

las medemas? Vulain nus in summa turnar a la normalitad d'ina giada? E sche nus vulessan propri turnar a quella normalitad, ans permettess il stadi quai? Il stadi che decida actualmain sch'ils nons pon anc avoir contact cun ils biadis.

U schia avain nus panica, studegiain curvas e models d'infecziun, e nus pudain già avoir panica da la segunda unda dal virus. E suenten? Panica dal proxim virus? La vita daventa adina pli inumana. Tolerain nus quai?

Jau na dorm betg adina bain en quest temp burascus. Ultimamain hai jau dentant siemià da Momo. La giuvna ch'aveva salvà las fluras dal temp dals umens grischs che vulevan engular il temp als umans. Momo aveva salvà il temp uman cun agid da maister Hora e da la tartaruga Kassiopeia. Momo aveva decidì che quai na va bain betg da sa laschar engular ina da las essenzas dal esser uman. Ed ella era s'engaschada per questa persvasiun cun sauna raschun. Nus duvrain puspè ina Momo.

\* David Spinnler da Sta. Maria è maingestiun dal Parc da natüra Biosfera Val Müstair.